


IFI

N'IMPANO.



Wari umunsi wa gatanu udasanzwe. Data yabyutse mu ruturuturu mbere y'uko izuba rirasa maze yambara ikoti ry'imvura n'ingofero y'icyatsi kibisi yakundaga kwambara.


Nange aho nari ndryamye, nabyuwe n'urusaku maze mpura nawe mu muryango asohoka. Ni uko arampobera aranyongorera ati: "Uyu munsi ndakuzanira ifi hamwe n'impano." Narishimye maze ndiyamira nti: "Impano imeze ite?" ariko ntiyansubiza.




Yahise yurira igare rye agenda aririmba ati: “Tegereza uraza kubona icyo aricyo.” Yamanutse umuhanda ugana mu Kabondo anyonga vuba vuba kandi anavugiriza nk’uko yakundaga kubigenza. Yari agiye ku kiyaga cya Rucenge.




Data yari umurobyi kimwe na Se Kanombe ndetse na Sekuru Nyagahene wari umurobyi w'umuhanga ndetse akaba umusare. Buri gitondo abarobyi bitegerezaga izuba rirasa, bakarambura inshundura zabo ndetse bakoza amato yabo. Kugira ngo birinde impanuka, bitegerezaga aho umuyaga uri guturuka bakabona gufata iy'amazi.





Iyo ubwato bwageraga mu mazi, data ni we wagashyaga. Ni uko amaboko ye agafata ingashyi maze amaguru ye akayerekeza mu mpande. Imitsi y'ijosi n'umugongo yariramburaga maze akagashya aririmba ati: "Manuka manuka. Shakashaka ifi. Komeza komeza wihagarara."




Nange niriwe ndeba mu kirere umunsi wose. Hiriwe hasa neza nta bicu na mba! Mbega byiza! Niriwe ntekereza amagambo data yambwiye ati: “Ifi hamwe n’impano.” Nibazaga icyo ari bunzanire avuye ku kiyaga. Rimwe na rimwe yanzaniraga amacupa meza yatoye mu mazi, ubundi akazana akantu yankuriye hakurya y’ikiyaga.



Kenshi data atahana inkuru z'ibyabaye. Umunsi umwe basanze utunyamasyo twinshi ku nkombe z'ikiyaga ni uko twose badusubiza mu mazi kugira ngo tudapfa. icyo gihe nabajije mu ijwi rinini nti: "None se twari twakuwe n'iki mu mazi?"

Yaramwenyuye maze arambwira ati: "Mu kiyaga hari igihe haza umuyaga mwinshi maze amazi agahungabana ateragana hirya no hino. Ibyo byitwa imiraba. Imiraba rero niyo yatumye utunyamasyo tugwa ku nkombe."






Iteka iyo Data ari mu kazi aba aririmba. Iya ari kugashya aba aririmba, iyo anaga inshundura aba aririmba, iyo akura inshundura mu mazi aba aririmba. Indirimbo ihora ari: “Manuka manuka. Shakashakisha ifi. Komeza komeza wihagarara.”

Uwo munsu bugorobye najyanye na Nyogokuru ku muhanda tugenda tunganira ku burobyi. Maze arambwira ati: “Nge ndashaka kurya tilapiya nijoro.” naho nge nti: “Nge ndashaka kurya kapiteni.” Araseka ati: ‘Izo ntabwo ziba mu kiyaga cya Rucenge. Ikindi kandi, muri iyi minsi amafi yashize mu kiyaga.’”



Amezi make mbere y'aho abarobyi bari bashyamiranye n'abakorera siporo n'imyidagaduro mu kiyaga. Data yakemuye icyo kibazo ababwira y'uko impande zombi zagakwiye koroherana kuko amazi ari aya bose.



Data yari yajyanye na Marume hamwe na babyara bange kuroba. Barebye ibyo barobye basangamo agafi kakiri gato maze Data arakarekura gasubira mu mazi. Muzo bari barobye harimo na tilapiya, zimwe Nyogokuru yashakaga.



Bumaze kwira numva Data yinjira mu gikari avugiriza. Nahise nsohoka nishimye ndetse mbyina ndamusanganira, ndamuhobera maze mubaza impano anzaniye. Yaransubije ati: “Irebere.”
Ni uko ndeye mbona ni iryinyo ry’igifi kinini. Bwari ubwa mbere mbonye iryinyo ry’ifi. Yewe sinarinzi ko amafi agira amenyo. Naranzezerewe.

